

# Yirsitiejl Sul

Zzirmar Maerssor Warsixrtixr Leil Zzirmar Maerssor Nr Bei Lol

**1** <sup>1</sup>Yalhasuirlur zzirmar bei car, yar Yixlduxl goxrjia<sup>a</sup> cirdae a Gursixr <sup>b</sup>goxrjia zzezze maelmaer a cirxiu nrzei sir (127) maex middei leil guaxr dae. <sup>2</sup>Yar Susa zzi gga zzirmar bei ggie halmaex zzirmar bei. <sup>3</sup>Yar zzirmar bei so koxl hal cir koxl gga, yar, yar woxr-ke vaervaerpor mel leil nei yar leil visser su vaervaerpor mel leil zzo zzor qie; Bosi goxrjia nei Mardaexl goxrjia gga meixr guaxr su vaervaerpor, quexrlixl zza su ca, cirmaex-hanga gga cabessor nei vaervaerpor mel lei ca dae. <sup>4</sup>Yar yaa dax, yar ddei goxrjia ddei yarzi be, yarzi sexr, yarzi middux hal mel leil kuar a, hhelhhelnei cirxiu heixlcei (180) ni kuar bbi a. <sup>5</sup>Nixixl eilmel bbi ho a, yoxl Susa zzi gga goxr dae cassor-worssor vaervaer yeye maelmaerjjia leil, zzirmar hher ggie vixlux dae ggie zzaexggu gga zzo sir ni zzor qie. <sup>6</sup>Zzo zzor qie ggie halmaex mae piulpiu nei mae laxllaxr gaxl dae. Zzir mesixl-sixl sser nei jjiussi yixrsaexr baezo sser a, mae mel leil yol piulpiu sseigu leil sae nolvar mel gga neixl gex dae. Piu sae bei teixl lei yixrgguci mel, yol nilni, yol piulpiu, yol saelsae, yol neixlneix niaxl deix dae middur ddei leil dol dae. <sup>7</sup>Yaa zzipbaer dda a sser dae sae bei teixl lei beizi mel, zzi dax le-nr-sel. Zzirmar ddei hoxrcixlcixlmo zzirmar hhexr dda dae zzipbaer mel yaa leil da. <sup>8</sup>Nael zzirmar ddei mel yar woxrke vaervaerpor mel leil miardal a, ca mel leil armael arsae dda niazzir arsae dda lol, yel zzipbaer dda a, ca mel leil guax nr ddo leiddur ar ddei zza. <sup>9</sup>Zzirmar maerssor Warsixrtixr lei zzirmar hher ggie halmaex gga zzorci-ddami baer a, ssormaer mel leil zzo zzor qie.

---

<sup>a</sup>1:1 Yixlduxl goxrjia Yixlduxl goxrjia ddei mel hherdder eilleix ddei Yixlduxl goxrjia ddei nga a.

<sup>b</sup>1:1 Gursixr Gursixr goxrjia ddei mel hherdder eilleix ddei Aesaexl'exrbiryal goxrjia ddei nga a.

<sup>10</sup> Sir ni cir ni, zzirmar ddei mel zzipbaer dda a, ho dda ho ggesse a dder yar dax hher dae a yar leil visser su taexlji Mirfuxlmaxl, Birsita, Habonaxr, Birgexrta, Yaxlbaxrta, Xidaxr nei Jiaxrjia yaa sirler leil miardal a, <sup>11</sup> Zzirmar maerssor warsixrtixr leil oldde leil kox labox taex kox dae lol a, zzirmar meixsaer qir leil qie gger si lei lol. Zzirmaer maerssor ddei mel yarzi zae ar ddei a, yel zzirmar ddei yar woxrke vaervaerpor mel leil nei cassor-worssor mel leil igax lol niazzir. <sup>12</sup> Nael zzirmar maerssor Warsixrtixr mel taexlji bbeix gger dae zzirmar miardal dae ddei leil no-nr-ni a, yar nr lei. Yel zzirmar ddei dder yarzisael sirzzi, nixmox zzar seifu zzerzzelzzer faex.

<sup>13</sup> Zzirmar bei zza wo dae ddei mel azo sirzzir zza a mel, lixfaxr saexl su nei leiddur saexl su ca mel leil arsae xiar dae biex. Yel yar dder cirza-hanga saexl su mel leil biex. <sup>14</sup> Halcar, zzirmar dax hher carbeix yar woxrke vaervaerpor mel mel Bosi goxrjia nei Mardaexl goxrjia su Jiaxrsixlnaxr, Sixldaxr, Yamarta, Tasisi, Mirlixl, Marxinaxr nei Mirmurga yaa nga a; yaa mel zoxl a zzirmar ddei leil mia dae; yaa goxrjia ddei gga vaervaerpor vaer zzir mel bei dae. <sup>15</sup> Zzirmar ddei yaa leil biex a bbeix: “Ngo maerssor Warsixrtixr mel, taexlji yar leil bbeix gger dae ngo miardal dae ddar mel leil no-nr-ni, lixfaxr dax zox dae a arsae bei nia neil?” <sup>16</sup> Mirmurga dder zzirmar nei vaervaerpor mel meixsaer qir leil ddarkoxl a bbeix: “Zzirmar maerssor Warsixrtixr no-nr-ni a mel, zzirmar leil lar de dae nr nga a nei, zzirmar guaxr dae middei cirmaex-hanga gga zzirmar woxrke vaervaerpor mel leil nei cassor-worssor maelmaerjjia leil lei ke. <sup>17</sup> Zzirmar maerssor bei dae eil jji arsae bei lei ssormaer maelmaerjjia ddei nolba gga biar ci var, yaa bbeix: ‘Yalhasuirlur zzirmar yar maerssor leil yar dax lei miardal, nael yar zzael nr lei,’ eine bbeix var, yel yaa dder armael ddei capor leil i zeil var. <sup>18</sup> Eilni Bosi goxrjia su nei Mardaexl goxrjia su ssormaer mel zzirmar maerssor bei dae eil jji leil bbejjiur a, arsae bei lei zzirmar woxrke vaervaerpor maelmaerjjia leil eilmel sael a bei var. Eine zzezze, i zeil dae mel nei seifu faex dae mel daxlgaxl-daxllixl ddux lei a. <sup>19</sup> Zzirmar ni zzirdae a seir arddeirnga a dder miardal zeil a, Bosi

goxrjia nei Mirdiryal goxrjia ddei lixfaxr gga vaexr ji a, arddolcar ci a lei gier-nr-box, Warsixrtixr leil zeixleixr lei zzirmar meixsaer qir leil lei lol nr ddo, bir yar leil seir ca ddei leil zzirmar maerssor bei lol. <sup>20</sup> Zzirmar miardal zeil lei eilmel goxrjia vaervaer eil ddei gga biar bei ho mel, capor ddei be bbeixsael sol zzorbbeixlei, ssormaer maelmaerjgia lei armael capor leil seilseir a i du var,” eine bbeix a. <sup>21</sup> Zzirmar ddei nei vaervaerpor maelmaerjgia lei Mirmurga bbeix dae ddar mel seir zzirdae a, zzirmar ddei dder ddar eilmel dax zox dae a bei a. <sup>22</sup> Circuxr-hanga ddei ddar sser nei cirmaex-hanga mermi ddei sul mel sser a, zzirmar miardal dae ddei vaexr zeil lei a, cirmaex-hanga mermi leil bbeix gger, capor mel ake hhexr leil guaxr su ddei bei nia; ddar bbeix quexrlixl zza nia.

### Yirsitie Leil Zzirmar Maerssor Bei Lol

**2** <sup>1</sup> Eine goxr ho a, Yalhasuirlur zzirmar sirzzi nor a dder Warsixrtixr leil nei Warsixrtixr bei dae mel leil, halae Warsixrtixr leil arsae faxr mel leil holcir du lei a. <sup>2</sup> Yel zzirmar leil visser dae vaervaerpor mel zzirmar ddei leil bbeix: “Ca mel leil miardal a, zzirmar leil capor dax naer nr goxr, zaelzae mo ssormaerleixl ar mel zo gger nia. <sup>3</sup> Zzirmar, ni goxrjia gga cirmaex-hanga ddei vaervaerpor mel leil miardal a, capor dax naer nr goxr zaelzae mo ssormaerleixl maelmaerjgia leil, zzirmar hher dae Susa zzi gga, ssormaer mel hher ggie xi hal zzaex gga hier mal lei a, ssormaer mel leil guaxr su, zzirmar hhexr ddei taexlji Xigie leil jia gger, yaa ggecir leil sser labox nerxiuxiu mel yaa leil gger. <sup>4</sup> Zzirmar ni lizoxr dae ssormaer ddei leil ni maerssor bei lol a, Warsixrtixr dirtu bei,” eine bbeix a. Zzirmar ddei zzirdae a ddar bbeix dae eil ddei seir a, yar dder eine bei a.

<sup>5</sup> Zzirmar hher dae Susa zzi ddei gga Yoxrdaxl su ca ar ddei zza, yar leil Moxldirgier mi; yar mel Bixlyarmir su ca Zisixl ddei leixwor, Sixlmeir ddei lilbol, Yar'er ddei ssor a. <sup>6</sup> Halleix, Babirluixr goxrjia ddei zzirmar Nixrbuxljiaxrnixrsar Yiluxlsaler zzi gga, Yoxrdaxl

goxrjia ddei zzirmar Yigenixryar <sup>c</sup>leil nei cassor-worssor mel leil ssu si lei a, Moxldirgier leil lei ssu dax si lei a. <sup>7</sup> Moxldirgier yarbbordaellael ddei ssormaer Hadaxlsa mel yarbbor yarma lei si a; yel Moxldirgier yar leil hier dae a, yar leil armael ddei ssormaer bei lol a. Giedae yar leil yoxl Yirsitie mi. Yar mel zae zae zae, jial zae jial ssormaer ar ddei a. <sup>8</sup> Zzirmar ddei ddar mel miardal teixl lei a; yel ssormaer zaelzae mel leil dder zzirmar hher dae Susa zzi gga ae pex si lei a, ssormaer mel leil guaxr su ca Xigie leil jia gger a; Yirsitie leil lei zzirmar hher ggie xi gga ho mal gger a, Xigie leil jia gger a. <sup>9</sup> Xigie Yirsitie leil perniar a dder yar leil seir lol, jiuurjiurmaemae yar sser zoxr nerxiuxiu mel nei yar li wo mibbe mel yar leil gger. Yoxl zzirmar hher ggie gga ssormaer sirlar tiur teixl lei a, yar leil visser lol. Yar leil nei zzirmar hher ggie tiur teixl lei ssormaer mel leil, ssormaer hher ggie xi naxrcixl zzir mel gga ba dil lol. <sup>10</sup> Moxldirgier mel Yirsitie leil, yar arddol su ca nei azo cuxr ca a, ca leil saexl lol nr ddo miardal a; yel yar ca mel leil bbeix nr gger. <sup>11</sup> Moxldirgier cirni-cirni ssormaer mel hher ggie xi hal zzaex xilmeir ssi za dae a, Yirsitie zzasoso dae bbe saexl niazzir, halae zzizzi a arsaenga var saexl niazzir.

<sup>12</sup> Ssormaer mel leiddur dax zox dae a hoba ggecir ddei leil ceinir xiubbo seibeix lol nia: xilmeir hal qiuxl xiubbo nael moxlyoxl ssuvi sser; giedae hal qiuxl xiubbo nael, nerxiuxiu mel nei ggecir seibeix lol labox sser. Nixixl ddei bbi ho a dder, cirddei-cirddei ddir a, zzirmar Yalhasuirlur dax ssi. <sup>13</sup> Ssormaer cirddei-hanga, ssormaer hher ggie zzaexggu gga cirdae a zzirmar hher ggie ssi car, ssormaer ddei li dae hazza lei yar leil guaxr su ddei yar leil gger. <sup>14</sup> Yar eilmerxixl ddir a, giedae cir nehe dder, yar leil ssormaer hher ggie kebal ar maex gga hier mal a, zzirmar ddei maeryemo leil guaxr su taexlji Sajiaxr leil jia gger. Nrbba dder zzirmar ddei yar leil lizoxr a, zeixleixr yar mi ddei ti dae a, yar leil ae a nga arnar; nrnga a nael, yar dder zeixleixr ddir a zzirmar leil mia wo nr ddo a.

<sup>15</sup> Yisitie mel Moxldirgier yarbbordaellael Yalbirhiexr ddei ssormaer a; giedae Moxldirgier Yisitie leil yar ssormaer bei lol a. Yisitie dax luixr ci a zzirmar dax ddir car a; Yisitie mel ssormaer mel leil guaxrsu taexlji Xigie yar leil bei har gger dae mel leil cuaxrteixl a, kebal li nr dax. Ha Yirsitie leil mia su mel dder yar leil nolnger. <sup>16</sup> Yalhasuirlur zzirmar bei sir koxl hal cir koxl cei xiu gga, hherdder Tixrbir ae hal xiu gga, Yirsitie leil zzirmar hher ggie hier mal a. <sup>17</sup> Zzirmar ddei Yirsitie leil nolnger a, bir kebal ssormaer mel leil lei nolnger leixl, yar leil perniar a bir ssormaer maelmaerjjia leil lei perniar leixl. Zzirmar ddei dder zzirmar maerssor kox labox kardu taex yar oldde ddei leil kox gex gger a, yar leil zzirmar maerssor bei lol a, Warsixrtixr ddei dirtu bei lol a. <sup>18</sup> Zzirmar ddei Yirsitie leil bbeix a ggie vaervaermo ar caxr baxl a, vaervaerpor mel leil nei cabessor mel leil qie si lei a zzo zzor lei lol. Yoxl cirgoxr-lorbba leil lei wornol lol, halae ca mel leil zzaegu naxrcixlcixl mo ho.

### Moxldirgier Zzirmar Leil Olga Jiuxl

<sup>19</sup> Capor dax naer nr goxr seir ssormaerleixl mel leil nr boxl ddei ae pex car, Moxldirgier mel zzirmar hher ggie gielmi alddur dax halmaex cux dae. <sup>20</sup> Yirsitie mel halleix sael a Moxldigier ddei ddar no, yel yar Moxldirgier miardal dae mel dax zox dae a, halae yar arddol su ca, azo cuxr ca a, ca mel leil bbeix nr gger seir. <sup>21</sup> Halcar, Moxldirgier mel zzirmar hher ggie gielmi alddur dax cux dae, zzirmar ddei taexlji mel gga alddur su su Xutaxl nei Pixltaxl yaa nnel mel, Yalhasuirlur zzirmar leil seifu faex a, yar leil ker seixl niazzir. <sup>22</sup> Nael Moxldirgier saexl a, Moxldirgier dder zzirmar maerssor Yirsitie leil bbeix gger a. Yirsitie Moxldirgier ddei mi ddei bbeix dae a zzirmar ddei leil bbeix gger a. <sup>23</sup> Ca mel eil ddei ngazizi a bbe i a, ngazi a bbe saexl a dder, ca hal nnel leil sixlerte mel leil gaxl gex gger a, seixl zil gger a. Eimel zzirmar meixsaer qir leil sul leil vaexr deix gger a.

## Hamaxl Yoxrdaxl Su Ca Mel Leil Bei Zil Gger Niazzir Dae

**3**<sup>1</sup> Eine goxr ho a, Yalhasuirlur zzirmar mel, Yaljiaxr cuxr ddei ca Hamirdaxlta ddei ssor Hamaxl leil vaervaerpor bei vaer dax lol a, yar leil bir yar dax cirgo a vaervaerpor mel leil lei vaer leixl lol. <sup>2</sup> Zzirmar hher ggie gielmi alddur dax hher dae zzirmar leil visser su vaervaerpor hazza lei, Hamaxl leil cizixl gger a Hamaxl leil kuar gger; eil ddei mel zzirmar ddei miardal a. Moxldirgier larnei yar leil cizixl nr gger, yar leil kuar nr gger. <sup>3</sup> Zzirmar hher ggie gielmi alddur dax hher dae a zzirmar leil visser su vaervaerpor mel Moxldirgier leil biex a bbeix: “Ni arsaenga a zzirmar miardal dae mel leil no-nr-ni leir?” eine bbeix a. <sup>4</sup> Yaa bbecir-bbeni Moxldirgier leil quex, nael Moxldirgier halae no-nr-ni. Moxldirgier yaa leil yar mel Yoxrdaxl su ca a bbeix gger ho a; yel yaa dder Hamaxl leil bbeix gger a, Moxldirgier Hamaxl leil cizil nr gger a, Hamaxl ddoddo bbe i? <sup>5</sup> Hamaxl Moxldirgier yar leil cizixl nr gger, yar leil kuar nr gger ggie mia a dder seifu faex zildu a. <sup>6</sup> Halmaxl Moxldirgier mel Yoxldaxl su ca a saexl ho a. Hamaxl zzirdae a Moxldirgier cirmuzil leil lar bei zil gger arddeirnga a mel, miar yelye a cir ddei a; yel yar dder Yalhasuirlur zzirmar ddei goxrjia cirddei-lorbba gga, Yoxrdaxl su ca maelmaerjjia leil, hherdder Moxldirgier dax cir cuxr su mel leil bei zil jjia gger niazzir dae.

<sup>7</sup> Yalhaxuirlur zzirmar bei ceinir (12) koxl hal koxl gga Guxlsixlxiu hherdder “Nixrsarxiu” gga, Hamaxl ca mel leil miardal a, nixixl i a yar meixsaer qir leil nijiu lol (yoxl pur'aer nijiu lei bbeix) a, yar xiar dae mel bei niazzir. Yel Zalxiu hherdder “Yaldaxrxiu” eil xiu leil nijiu teixl lei a. <sup>8</sup> Hamaxl Yalhasuirlur zzirmar leil bbeix: “Ca eine ar cuxr a zzirmar ni ddei goxr ddei gga cirmaex-hanga ca mel dax goxr ji dax dae; yaa ddei lixfaxr mel kebal ca mel ddei lixfaxr dax le-nr-sel; yaa lei zzirmar ddei lixfaxr mel dax bei nr mae. Yel yaa leil gol dae lol arddeirnga a, zzirmar dax seirggiebbae nr zza. <sup>9</sup> Zzirmar, ni zzirdae a seir arddeirnga a, ngo ni leil qie, miardal zei a yaa leil bei zil jjia gger lol. Eine nga a, ngo dder piu socei-limeir zi vei teixl lei a, goxrjia ddei gga zzirbae guaxr su ddei leil jia gger

a, zzirmar ddei zzirbae dol ji ggie dol ji lol ddo,” eine bbeix a. <sup>10</sup> Yel zzirmar ddei dder yar leixrhher leil ddexr dae za giexl labox leixrdox ddei lixr zei lei a, Yoxrdaxl su ca mel leil dir su, Yaljiaxr cuxr gga ca Hamirdaxlta ddei ssor Hamaxl leil gger a. <sup>11</sup> Zzirmar ddei Hamaxl leil bbeix: “Piu eilmel halae ni armael dol dae ddo; ca eilmel lei ni leil jia gger, ni yaa leil arsae bei niazzir dder arsae bei ddo,” eine bbeix a.

<sup>12</sup> Guxlsixlxu ceiso cir ni, zzirmar leil sul vaexr gger su mel leil ae si lei a, yaa Yalhasuirlur zzirmar ddei mi sser a, Hamaxl miardal dae mel dax zox dae a, Circuxr-hanga ddei ddar mel sser nei cirmaex-hanga mermi ddei sul mel sser a, zzirmar miardal dae mel vaexr zei lei. Yoxl, zzirmar ddei za giexl labox leixrdox ddei sser a, za giexl deix a, vaervaerpor nei cirmaex-hanga ddei vaervaerpor, halae circuxr-hanga ddei vaervaerpor mel leil ho mal gger. <sup>13</sup> Zzirmar miardal dae mel vaexr ddeix dae hal ddei xil ho su mel leil jia gger a, zzirmar guaxr dae middei cirmaex-hanga gga lei ho ci lol. Hal ddei leil mel Zalxiu gga hherdder “Yaldaxrxu” gga ceiso cir ni, Yoxldaxl su, capor, ssormaer, camar nei anix maelmaerjgia leil seixl zil jgia gger a, ggielggie mier lol nia, halae yaa ddei zzirbae nei zzaegu mel su si lei a, armael ddei bei nia, eine vaexr dae. <sup>14</sup> Zzirmar miardal dae mel ca zei lei a, cirser-hanga gga miardal zei. Yel circuxr-hanga leil bbeix gger a, hal cir ni leil weix a, bei har zaxr dae lol. <sup>15</sup> Xil ho su mel zzirmar miardal dae mel dax zox dae a, jjurjiur-maemae ssi a, zzirmar miardal dae mel vaexr deix dae hal ddei Susa zzi gga ho jiax a. Yel Susa zzi gga goxr dae ca mel gexr a, zzilzzil-zzerzzer mo. Yalhasuirlur zzirmar nei Hamaxl yaa nnel zzael, cirgo a hher dae a zzipbaer dda.

### Moxldirgier Yirsitie Leil Qie A Beijiu Lol

**4** <sup>1</sup> Moxldirgier eilmel leil maelmaerjgia saexl a dder cix zildu a, pia xiux si bbaer gger a, zzir pia veixr, oldde leil kurlu xiu deix a, bbialil-bbialor aenge a, zzi ddei gga ssi za dae. <sup>2</sup> Nael zzir pia veixr dae a mel zzirmar hher ggie gielmi alddur gga ddir nr ddo, yel yar zzirmar hher ggie gielmi gguqir ssi ci a dder ssi nor dae a. <sup>3</sup> Zzirmar

ddei lixfaxr mel nei zzirmar ddei miardal dae ddei vaexr deix dae mel cirmaex-hanga gga ho ci a, cirmaex-hanga gga Yoxrdaxl su ca mel dder yarzi cix, almeixr lei nr zzor nge, bbialil-bbialor aenge, zzir pia wol dae a kurlu mel gga guir ji dae su lei yarzi miur.

<sup>4</sup> Zzirmar maerssor Yirsitie leil visser su ssormaer mel nei taexlji mel (Yirsitie dax) lei a, Moxldirgier bei dae mel Yirsitie leil bbeix gger a; Yirsitie (nixmox zzar) zzasol zildu a dder Moxldirgier leil pia ar mel ho mal gger a, yar leil zzir pia mel lael teixl lol, nael yar ni li. <sup>5</sup> Yel Yirsitie dder zzirmar ddei miardal mal lei a yar leil visser lol taexlji Hatagexr leil ae si lei a. Yirsitie Hatagexr leil miardal a Moxldirgier leil i ssi lol a, arsae lerler nga, yoxl arsae nga faex ar ddei a saexl niazzir. <sup>6</sup> Yel Hatagexr zzirmar hher ggie gielmi alddur dax kuaxkuax ggie halmaex Moxldirgier leil i ssi. <sup>7</sup> Moxldirgier armael pex dae mel maelmaerjjia yar leil bbeix gger a; halae Yoxrdaxl su ca mel leil bei zil jjia gger arddernga a, Hamaxl piur vei teixl lei a, zzirmar ddei zzirbae dol ji ggie dol ji lol eilmel lei yar leil bbeix gger a. <sup>8</sup> Moxldirgier yoxl Susa zzi gga niaxl teixl lei dae Yoxrdaxl su ca maelmaerjjia leil bei zil jjia gger nia vaexr deix dae hal mel, Hatagexr leil ar zul gger a, yar leil Yirsitie leil vei gger lol a, i lol. Yoxl arsae lerler nga mel Yisitie leil bbeix gger lol, halae Yisitie leil miardal a zzirmar dax ddir a, armael dax cir cuxr su ca mel leil weix a, zzirmar leil qiuxr ssi lol. <sup>9</sup> Hatagexr jjixr lei a, Moxldirgier ddei ddar mel Yirsitie leil bbeix gger a. <sup>10</sup> Yirsitie dder Hatagexr leil miardal a Moxldirgier leil ddarkoxl jjixr lol a bbeix: <sup>11</sup> “Zzirmar leil visser su vaervaerpor maelmaerjjia nei cirmaex-hanga ddei ca mel lei zzirmar dixl dae lixfaxr eine ar ddei zza saexl: zzirmar ddei nr ae, armael ddei armael zzirmar hher ggie ddir a zzirmar leil i ssi ardderirnga a, capor bbeixsael ssormaer nga zzorbbeixlei bei zil gger nia; nrbbba dder zzirmar ddei sae bei teixl lei zzargger caex yar leil cei teixl gger lei a nga arnar, nrnga a mel dder gol nr cexr. Nael zzirmar ddei ngo leil nr ae mel cir xiubbo nga ho a,” eine bbeix a. <sup>12</sup> Moxldirgier Yirsitie bbeix gger lei lol ddar mel leilbbejjiur ho a, <sup>13</sup> yar dder ca leil qie a Yirsitie leil bbeix gger jjixr lol a bbeix: “Ni zzirmar hher ggie hher dae a dder ni kebal Yoxrdaxl su ca mel sael



a nr seir eimel pex dae nr var a zzir nr ssa. <sup>14</sup> Eilcar ni arjjiuljjiu a hher dae a zzirmar leil nr qiur ssi arddeirnga a lei, Yoxrdaxl su ca mel leil kebal jiuxl su zza, nael ni nei niabbor hhexr arsae bei lei si jjia nia. Ni zzirmar maerssor bei wo a mel, eilni leil wiex ni nr saexl a ngo,” eine bbeix a. <sup>15</sup> Yirsitie dder ca leil miardal a Moxldirgier leil bbeix gger lol a, bbeix: <sup>16</sup> “Ni Susa zzi ddei gga Yoxrdaxl su ca maelmaerjjia leil hher pex du lei lol a, ngo leil weix a, zzo lei nr zzor, dda lei nr dda Arbosobo dax ddar so xixl so ni biar nia. Ngo nei ngo leil visser su ssormaer mel lei eine bei nia. Eine goxr ho a, ngo dder lixfaxr ddei dax nr zox ddir a zzirmar dax ssi. Ngo si bbaexl dder nga a,” eine bbeix a. <sup>17</sup> Yel Moxrdirgier dder Yirsitie miadal dae mel dax zox dae a bei ssi a.

### Yirsitie Zzirmar Nei Hamaxl Leil Almeixr Zzor Qie

**5** <sup>1</sup> So ni cir ni, Yirsitie mel zzirmar maerssor veixr labox pia tox veixr dae a, zzirmar hher ggie zzaexggu lavulzzar ddei gga ddir a, zzirmar hher ggie giex dax mal dae a, ngier dae. Zzirmar ddei nael zzirmar hher ggie baxrde taex leil cux dae a, zzirmar hher ggie xi gielmi alddur dax mal dae. <sup>2</sup> Zzirmar ddei zzirmar maerssor Yirsitie zzaexggu ddei gga ngier dae ggie mia a dder nixmox zzar Yirsitie leil perniar a, leixrhher gga sae bei teixl lei zzargger caex yar leil cei teixl gger. Yirsitie dder xilmeirbbae ssi a, zzargger caex ddei oldde piar a leil ta. <sup>3</sup> Zzirmar ddei yar leil bbeix: “Zzirmar maerssor Yirsitie, ni azo li? Ni azo qiuxr? Hherdder goxrjia ddei cir peix nga zzorbbeixlei, ni leil gger nia.” <sup>4</sup> Yirsitie ddarkoxl a bbeix: “Zzirmar ni zzirdae a seir arddeirnga a dder, zzirmar, ni leil qie, Hamaxl leil hier dae a, eilni ngo ni leil zzorci-ddami bei har gger dae mel zzor lei.” <sup>5</sup> Zzirmar ddei bbeix: “Nialngasael Hamaxl leil ae si la a, Yisitie bbeix dae ddar mel dax zox dae a bei ssi,” eine bbeix a. Yel zzirmar ddei dder Hamax leil hier dae a, Yirsitie bei har dae zzorci-ddami mel zzor ssi. <sup>6</sup> Puxrto zzipbaer dda dae car, zzirmar ddei yoxl Yirsitie leil biex a bbeix: “Ni azo li? Ngo arsae bei lei ni leil gger. Ni azo qiuxr? Hherdder goxrjia ddei cir peix nga zzorbbeixlei, ni leil gger nia.” <sup>7</sup> Yirsitie ddarkoxl a bbeix: “Ngo li labox zza, ngo

qiuxr labox zza. <sup>8</sup> Zzirmar ngo leil seir lol, ngo li dae ngo qiuxr dae mel, zzirmar ngo leil gger yuex arddeirnga a, zzirmar, ni leil qie, Hamaxl leil hier dae a, zeixleixr ngo nia leil zzorci-ddami bei har gger dae mel zzor lei; arggeni ngo arsae bei lei zzirmar biex dae mel dax zox dae a bbeix gger.”

### Hamaxl Moxldirgier Leil Arsae Seixl Nia Xiarzaxr

<sup>9</sup> Hal cir ni, Hamaxl nixmox zzar ggese a, vaevae-sirsir a ddux lei a. Nael yar zzirmar hher ggie gielmi alddur dax ssi gel car, Moxldirgier halmaex gga hher dae a ngier nr du lei, yar leil i du sael lei nr bei mia a dder nixmox zzar Moxldirgier leil seifu faex zildu a. <sup>10</sup> Hamaxl seifu ddei sser gex dae a ake jjixr a, ca leil ae a yar ddei gaxggor-carbeix nei yar maerssor Xixllixlsi leil qie si lei lol. <sup>11</sup> Hamaxl mel yaa dax, yar yarzi be, ssormine cirke zza, halae zzirmar ddei yar leil bir kebal vaervaerpor mel leil nei zzirmar leil visser su ca mel leil vaer leixl lol kuar. <sup>12</sup> Hamaxl yoxl bbeix: “Zzirmar maerssor Yirsitie zzo zzor qie a, ngo leil lar zzirmar dax cirter a zzo zzor ssi lol. Arggeni zzirmar maerssor yoxl ngo leil qie a zzirmar dax cirter a zzo zzor ssi lol. <sup>13</sup> Nael ngo Yoxrdaxl su ca Moxldirgier zzirmar hher ggie gielmi alddur dax cux dae ggie mia a, seirseir eine ar zzu zza bbeixarnar a, ngo zzirdae a ngo dax seirggiebbær nr zza,” eine bbeix a. <sup>14</sup> Yar maerssor Xixlxlxi nei yar ddei gaxggor-carbeix maelmaerjia yar leil bbeix: “Nrnga a nael, muggiebbær nrzei nr (22) gocixr zza six jiaxjiax ar ddei bei a, arggenehe zzirmar leil qiuxr a, Moxldirgier leil six jiaxjiax ddei leil gaxl gex gger a, bei zil gger lol. Yel ni dder ggegge-sese a zzirmar dax cirgo a zzo zzor ssi cexr,” eine bbeix a. Hamaxl zzirdae a ddar eilmel seir, yel dder ca leil six jiaxjiax bei lol.

### Zzirmar Moxldirgier Leil Middux Lol

**6** <sup>1</sup> Halcir xixlmei zzirmar ddei yixrmeixljiu nr xie a dder ca leil miardal a, goxr gel lei ho mel vaexr deix dae sul mel vei si lei a, yar leil zza gger lol. <sup>2</sup> Jiajia alddur su su taexlji Pixltaxl nei Tixrlixl yaa nnel zzirmar Yalhasuirlur leil ke a, Moxldirgier bbeix teixl

lei hal mel vaexr deix dae halmaex malmal zza ci a. <sup>3</sup> Zzirmar ddei bbeix: “Moxldirgier eine bei a, yar leil azo gger a? Yar leil middux ddux lol a? Yar leil vaervaerpor bei vaer dax dax lol a?” Zzirmar leil visser su vaervaerpor mel ddarkoxl a bbeix: “Yar leil azo lei nr gger.” <sup>4</sup> Zzirmar ddei bbeix: “Arseir zzaexggu gga hher dae?” Halcar malmal, Hamaxl jiajia zzirmar hher ggie zzaexggu lamaebbaer ddei gga ddir lei a, zzirmar leil Moxldirgier leil yar bei har zaxr dae six jiaxjiax ddei leil gaxl deix gger a, bei zil gger lol qiuxr lei. <sup>5</sup> Zzirmar leil visser su vaervaerpor mel bbeix: “Hamaxl zzaexggu gga ngier dae.” Zzirmar ddei bbeix: “Yar leil ae dil la.” Eine bbeix a, <sup>6</sup> Hamaxl dder ddir a. Zzirmar ddei Hamaxl leil biex a bbeix: “Zzirmar perniar dae, zzirmar i du dae ca ddei leil arsae bei nia neil?” Hamaxl nixmox zzar xiar dae a bbeix: “Zzirmar perniar dae, zzirmar i du dae ca ddei, ngo nr nga a arseir nga bbeixleir?” <sup>7</sup> Yel Hamaxl dder bbeix: “Zzirmar perniar dae, zzirmar i du dae ca ddei leil eine bei nia: <sup>8</sup> zzirmar veixr goxr pia darsisi xiux vei si lei, halae oldde leil naxrcixlcixlmo ddexr dae zzirmar zzaer goxr mur ddei leil gga si lei a, <sup>9</sup> zzirmar woxrke, zzirmar ddei yarzi i du vaervaerpor ar ddei leil jia gger. Vaervaerpor eil ddei leil miardal a, pia darsisi xiux zzirmar perniar dae, zzirmar i du dae ca ddei leil veixr gex gger lol. Yar leil mur zzaer dae lol a, zzi gga ddei zzijiul mel ssi jiax lol. vaervaerpor ddei yar xilmeir leil ae dae a bbeix: ‘Zzirmar perniar dae, zzirmar i du dae ca ddei leil dder eine bei,’” eine bbeix a. <sup>10</sup> Zzirmar ddei Hamaxlleil bbeix: “Ni nialngasael pia darsisi eil xiux vei si nei oldde leil naxrcixlcixl ddexr dae mur ddei gga si a, ni bbeix dae mel dax zox dae a, zzirmar hher ggie gielmi alddur dax cux dae, Yoxrdaxl su ca Moxldirgier leil bei gger ssi. Ha ni bbeix dae mel, ciryoxr lei nganiul lol nr ddo,” eine bbeix a. <sup>11</sup> Yel Hamaxl dder Moxldirgier leil pia darsissi xiux veixr gex gger, yar leil mur zzaer deix lol a, zzi gga ddei zzijiul mel ssi jiax lol, halae yar xilmeirbbaer ae dae a bbeix: “Zzirmar perniar dae, zzirmar i du dae ca ddei leil dder eine bei,” eine bbeix a.

<sup>12</sup> Giedae Moxldirgier zzirmar hher ggie gielmi alddur dax jjixr ci a. Hamaxl zzael, nixmox zzar yarzi zzasol a, oldde ddei leil bbe

gex dae a, jiurjiur-maemae ake jjixr jixr a. <sup>13</sup> Hamaxl, yar pex dae maelmaerjjia seirseirmo, yar maerssor Xixllixlsi leil nei yar ddei gaxggor-carbeix maelmaerjjia leil biar gger a. Yar ddei gaxggor-carbeix olnolddu su mel nei yar maerssor Xixlixlsi yar leil bbeix: “Moxldirgier yarzi Yoxrdaxl su ca nga arddeirnga a, ni dder yar leil bei leixl nr xie; ni arsae bei lei yar dax bei wor nr xie,” eine bbeix a.

<sup>14</sup> Yaa halae Hamaxl dax ddar biar dae seir, zzirmar ddei taexlji mel dder Hamaxl leil nialngasael, Yirsitie bei har dae zzorci-ddami mel zzor ssi nia a zul lei a.

### Hamaxl Leil Bei Zil Gger

**7** <sup>1</sup> Zzirmar ddei Hamaxl leil hier dae a zzirmar maerssor Yirsitie dax zzorci-ddami zzor ssi. <sup>2</sup> Nr boxl ddei zzor ssi a, puxрто zzipbaer dda dae car, zzirmar ddei yoxl Yirsitie leil biex a bbeix: “Ngo maerssor Yirsitie, ni azo li? Ngo arsae bei lei ni leil gger. Ni azo qiuxr? Hherdder goxrjia ddei cir peix nga zzorbbeixlei ngo ni leil gger nia,” eine bbeix a. <sup>3</sup> Yirsitie ddarkoxl a bbeix: “Zzirmar ngo leil seir lol, zzirmar zzirdae a seir arddeirnga a, ngo, nga loxia dae ddei mel dder, zzirmar, ni ngo ddei olga ddei leil jiuxl loxia; ngo qiuxr dae ddei mel dder, zzirmar, ni leil qiuxr, ngo dax cir cuxr ca mel ddei olga mel leil jiuxl la. <sup>4</sup> Ngo leil nei ngo dax cir cuxr su ca mel leil mel vur pixl gger ho a. Ngua leil bei zil gger, seixl zil gger a, mier jjia lol du a. Ngua leil vur pixl gger a, zebol mu ssi lol lalnga arddeirnga a, ngo dder meir ddei mix gex dae a, ddar nr bbeix. Hane a goxrsol mel zzirmar leil maxrfaxr lei nr piar.” <sup>5</sup> Yalhasuir-lur zzirmar yar maerssor Yirsitie leil bbeix: “Eine bei bel su ca ddei arseir a? Yar arddolmaex hher dae leir?” <sup>6</sup> Yirsitie bbeix: “Ngo leil dir su ca, ngo leil vuxryixr su ca mel dder nixmox neix su Hamaxl eil ddei nga a!” Hamaxl dder zzirmar nei zzirmar maerssor meixsaer qir leil gexr zildu a.

<sup>7</sup> Zzirmar ddei dder seifu faex zildu a, puxрто zzirbae dda ggie ngier du lei a, ddux a, vixlux dae ggie zzaexggu ddei gga ssi mal jixr a. Hamaxl mel zzirmar ddei yar leil zuixl dixl gger nia xiar har

ho a mia a dder ngier du lei a, zzirmar maerssor Yirsitie leil qiuxr a, yar leil jiuxl lol. <sup>8</sup> Zzirmar ddei vixlux dae ggie zzaexggu gga cirdae a, puxrto zzirbae dda ggie jjixr ci a, Hamaxl Yirsitie koxl dae, koxl dae a yixr labox baxrde taex leil puxr gex dae ggie mia a; zzirmar ddei bbeix: “Yar giel arsae ngo hher ggie, ngo meixsaer qir leil lei ngo maerssor leil nrbbba-nrbbba bei bel leir?” eine bbeix a. Ddar eil qir zzirmar meir gga bbeix teixl lei a qie, ca mel dder Hamaxl ddei qiaxrmeix ddei leil bbe gex du lei a. <sup>9</sup> Zzirmar leil visser su taexlji Habonaxr bbeix: “Hamaxl mel, ni leil ddar bbeix gger a ni leil jiuxl goxr Moxldirgier leil muggiebbaer nrzei nr gocixr (22) zza six jiax-jiax ar ddei bei gger a, eilcar Hamaxl hhexr ake dae ji dae,” eine bbeix a. Zzirmar ddei bbeix: “Hamaxl leil hal ddei leil gaxl deix gger a, bei zil gger ssi!” eine bbeix a. <sup>10</sup> Yel ca mel dder Hamaxl leil yar Moxldirgier leil bei har gger dae six jiaxjiax ddei leil gaxl deix gger a, bei zil gger a. Zzirmar ddei eine saelnei seifu faex nor.

### Moxldirgier Leil Vaervaerpor Bei Vaer Dax Lol

**8** <sup>1</sup> Hal cir ni, Yalhasuirlur zzirmar mel Yoxrdaxl su ca leil dir su Hamaxl ddei hazza-hamaer lei, yar maerssor Yirsitie leil gger a. Yirsitie zzirmar ddei leil Moxldirgier mel yar ddei cirssor a bbeix gger ho a; yel Moxldirgier lei zzirmar meixsaer qir leil lei a. <sup>2</sup> Zzirmar ddei Hamaxl dax vei xixl lei za giexl labox leixrdox ddei, yar leixrhher leil lixr teixl lei a, Moxldirgier leil gger a. Yirsitie lei Moxldirgier leil miardal a Hamaxl ddei hazza-hamaer leil guaxr lol.

<sup>3</sup> Giedae, Yirsitie yoxl zzirmar qihher dax puxr gex dae a, nge dae a, zzirmar ddei leil qiuxr a, Yaxljiaxr cuxr gga ca Hamaxl Yoxrdaxl su ca mel leil bei zil jjia gger xiar dae eil ddei bei pixl gger lol.

<sup>4</sup> Zzirmar ddei sae bei teixl lei zzargger caex Yirsitie dax cei mal a, Yirsitie dder ngier du lei a, zzirmar meixsaer qir leil ngier dae a, bbeix: <sup>5</sup> “Zzirmar, ni bei yuex, ni ngo leil seir lol, ni zzirdae a seir, halae ni ngo leil ggese arddeirnga a dder ni leil qie, ni miardal dae mel vaexr zei lei a, Yaljiaxr cuxr gga ca Hamirdaxlta ddei ssor Hamaxl cirmaex-hanga gga Yoxrdaxl su ca mel leil bei zil jjia gger nia miardal dae hal ddei bei pixl gger. <sup>6</sup> Ngo arsae, si leil ngo dax cir

cuxr su ca mel leil ke lol vixr bbeixleir? Ngo arsaе ngo ddei cirssor mel leil bei zil jjia gger lol vixr bbeixleir?” <sup>7</sup> Yalhasuirlur zzirmar yar maerssor Yirsitie leil nei Yoxrdaxl su ca Moxldirgier leil bbeix: “Hamaxl mel Yoxrdaxl su ca mel leil bei zil gger niazzir, yel ngo yar ddei hazza-hamaer lei Yirsitie leil gger ho a; ca mel lei Hamaxl leil six jiaxjiax ddei leil gaxl gex gger a, bei zil gger ho a. <sup>8</sup> Nael, zzirmar ddei mi ddei sser a, vaexr zei lei a, zzirmar ddei za giexl deix dae miardal dae mel bei pixl nr cexr a. Nael, eilcar nia zzirmar ddei mi ddei sser a, nia arsaе vaexr niazzir arsaе vaexr a, zzirmar miardal dae ddar mel Yoxrdaxl su ca mel leil vaexr gger ddo; zzirmar ddei za giexl labox ddei giexl deix ddo,” eine bbeix a.

<sup>9</sup> Saxngaxxiu eil xiu gga, hherdder Xiwa yuexl gga nrzei so (23) cir ni, zzirmar leil sul vaexr gger su mel leil ae si lei a, Moxldirgier miardal dae mel dax zox dae a, cirmaex-hanga mermi ddei sul mel sser nei circuxr-hanga ddei ddar mel sser, halae Yoxrdaxl su ca mel ddei sul mel sser nei ddar mel sser a, zzirmar miardal dae ddar mel vaexr lol, yel Yixlduxl mermi cirdae a, Gursixr mermi zzezze, cirxiu nrzei sir (127) maex middei gga Yoxrdaxl su ca mel leil, vaer-vaerpor mel leil nei cirmaex-hanga ddei vaervaerpor mel leil, halae circuxr-hanga ddei vaervaerpor mel leil faex gger lol. <sup>10</sup> Moxldirgier Yalhasuirlur zzirmar ddei mi ddei sser a, zzirmar miardal dae ddar mel vaexr zei lei, zzirmar ddei za giexl labox leixrdox ddei sser a za giexl deix, halae xil ho su mel leil miardal a zzirmar hhexr ddei mur beix jiax zzir ddei leil zzaer dae lol a, ho ssi lol. <sup>11</sup> Zzirmar miardal dae ddar mel veixr deix dae sul zul gga mel: zzirmar ddei cirmaex-hanga zzi gga Yoxrdaxl su ca mel leil cirgo a hher pex du lei lol a, armael ddei olga ddei leil jiuxl lol. Circuxr-hanga nei cirser-hanga gga Yoxrdaxl su ca mel leil dir su ca mel leil bei zil gger lol; yaa ddei maerssor nei aniux mel leil jiujiu bei zil gger lol; halae yaa ddei cirza-hanga mel su si lei lol; <sup>12</sup> cir ni ddei gga, Zalxiu, hherdder Yaldaxrxiu gga, ceiso cir ni, Yahasuirlur zzirmar ddei cirser-hanga gga, eine bei lol eilmel vaexr deix dae. <sup>13</sup> Zzirmar miardal dae ddar mel vaexr deix dae sul zul dax zox dae vaexr zei lei a, cirmaex-hanga leil saexl lol, circuxr-hanga leil bbeix gger. Ei-

ne nga a, Yoxrdaxl su ca mel dder bei har zaxr a, hal cir ni ci a yaa leil dir su ca mel leil bei koxl xixl. <sup>14</sup> Zzirmar ddei xil ho su mel leil miardal a, yaa dder jiurjiur-maemae zzirmar hhexr ddei mur yarzi beix jiax mel leil zzaer dae a ho ssi a. Zzirmar miardal dae ddar mel vaexr deix dae sul zul Susa zzi gga faex jiax jjia a. <sup>15</sup> Moxldirgier mel zzirmar hher ggie veixr labox pia laxllaxr nei piulpiu mel veixr dae, oldde leil kox labox sae bei teixl lei ar taex kox dae, halae zzir mesixlsixl sser a bei teixl lei teixlsibbor veixr labox jjiussi yixrsaexr pia darsisi ar xiux veixr dae a, zzirmar hher <sup>a</sup>ggie ddux lei a; yel Susa zzi gga ca mel lei ggegge-sese mo ae du lei a. <sup>16</sup> Yoxrdaxl su ca mel ggegge-sese arla, yarzi ggese, nixmox zzar sosarsar mo, ca mel lei yaa leil i du. <sup>17</sup> Zzirmar miardal dae ddar mel vaexr deix dae sul zul, middei cirmaex-hanga gga, zzi cirmaex-hanga gga faex ci a, Yoxrdaxl su ca mel zza wo a dder ggegge-sese arla, yarzi ggese, zzorci-ddami cirke baer teixl lei a, uxnixnix a zzor. Goxrjia hal ddei gga ca mel Yoxrdaxl su ca mel leil gexr a, ca cirke a dder armael leil Yoxrdaxl su ca loxr lol a<sup>d</sup>.

### Yoxrdaxl Su Ca Mel Yaa Leil Dir Su Ca Mel Leil Seixl

**9** <sup>1</sup> Zalxiu gga, hherdder Yaxldaxr xiu gga, ceiso cir ni mel, zzirmar miardal dae ddar mel bei nixixl cir ni nga a. Hal cir ni, Yoxrdaxl su ca mel leil dir su ca mel, Yoxrdaxl su ca mel leil guaxr zeigger niazzir; nael doxgoxleixr yaa, yaa leil vuxryixr su ca mel leil guaxr zeigger a. <sup>2</sup> Yoxrdaxl su ca mel Yalhasuirlur zzirmar ddei cirmaex-hanga ddei zzi mel gga hher pex du lei a, yaa leil ke su ca mel leil dir a, yaa dax zzi deil. Circuxr-hanga lei yaa leil gexr a, yel ca mel arseir lei yaa leil dir gex dae nr cexr. <sup>3</sup> Cirmaex-hanga ddei vaervaerpor mel, zzirmar leil sul vaexr gger su mel, circuxr-hanga ddei vaervaerpor mel nei zzirmar leil miar bei gger su ca mel, Moxl-

---

<sup>d</sup>8:17 ca cirke a dder armael leil Yoxrdaxl su ca loxr lol a Yils mel dder yaa, yaa ddei furkel ddei Yoxrdaxl su ca gier mal gger. Yaa ddei yaa lei yaa mel Yoxrdaxl su ca eine bbeix.

dirgier leil gexr a dder, maelmaerjjia lei Yoxrdaxl su ca mel leil bei-  
 jjiu. <sup>4</sup> Moxldirgier mel zzirmar hher ggie vaervaerpor bei dae a; yar  
 cirmaex-hanga gga lei middux, quexrlixl lei cir ni bir cir ni leil vaer.  
<sup>5</sup> Yoxrdaxl su ca mel yaa leil vuxryixr su ca mel leil arsae bei nia-  
 zzir dder arsae bei; yaa altor sser a, yaa leil dir su ca maelmaerjjia  
 leil seixl zil gger a, mier lol. <sup>6</sup> Yoxrdaxl su ca mel, Susa zzi ddei gga  
 ca ngorxiuler (500) seixl zil gger a, mier lol. <sup>7</sup> Yaa yoxl Basadaxl-  
 ta, Daxrfei, Yalsipaxlta, <sup>8</sup> Poxllata, Yaxldaxllixlyar, Yallixldaxlta,  
<sup>9</sup> Paxlmarsita, Yallixlsaexl, Yallixldaexl nei Waryesarta leil seixl zil  
 gger. <sup>10</sup> Ca eil ceimo jjia lei Hamirdaxlta ddei lilbol, Yoxrdaxl su ca  
 mel leil dir su Hamaxl ddei ssor a. Nael Yoxrdaxl su ca mel yaa ddei  
 zzaegu mel nael su nr si lei.

<sup>11</sup> Hal cir ni, zzirmar leil Susa zzi gga ca hormoler seixl zil gger a  
 bbeix gger a. <sup>12</sup> Zzirmar ddei dder yar maerssor Yirsitie leil bbeix:  
 “Yoxrdaxl su ca mel Susa zzi gga ca ngorxiu (500) ler seixl zil gger  
 a, mier lol; yoxl Hamaxl ddei ssor ceimo leil seixl zil gger a. Kebal  
 middei mel gga gielgiel arsaesael nga nr saexl a. Eilcar ni azo li, ngo  
 arsae bei lei ni leil gger; ni halae azo qiuxr, arsae bei lei ni leil bei  
 gger.” <sup>13</sup> Yirsitie ddarkoxl a bbeix: “Zzirmar zzirdae a seir arddeir-  
 nga a, Susa zzi ddei gga Yoxrdaxl su ca mel leil arggeni lei eilni  
 ni miardal dae mel sael a bei lol la, halae Hamaxl ddei ssor ceimo  
 ddei ggecir mel six jiaxjiax mel leil gaxl gex du lei lol la.” <sup>14</sup> Zzirmar  
 ddei dder eilmel sael a miardal zei a. Zzirmar miardal dae ddar mel  
 vaexr deix dae sul zul Susa zzi gga faex jiax jjia a. Ca mel dder Ha-  
 maxl ddei ssor ceimo ddei ggecir mel gaxl gex du lei a. <sup>15</sup> Yaldaxr  
 xiu gga ceili cir ni, Susa zzi gga ddei Yoxrdaxl su ca mel yoxl hher  
 pex du lei a, Susa zzi gga ca soxiuler (300) seixl zil gger a; nael  
 zzaegu mel nael su nr si lei.

<sup>16</sup> Zzirmar guaxr dae middei cirmaex-hanga gga Yoxrdaxl su ca  
 mel lei hher pex du lei a, armael ddei olga ddei leil fadae a, yaa leil  
 vuxryixr su ca sirmeir ngordu (75,000) seixl zil gger a; nael zzaegu  
 mel nael su nr si lei. <sup>17</sup> Eilmel mel Yaxldaxr xiu gga ceiso cir ni bei  
 a. Ceili cir ni wornol a, hal cir ni leil zzorci-ddami zzor a ggegge-  
 sese nixixl dixl mal gger. <sup>18</sup> Nael Susa zzi gga ddei Yoxrdaxl su ca



mel zzael, ceiso, ceili eil nr ni gga hher pex du lei a, yaa leil dir su mel leil seixl; ceingor cir ni wornol a, hal cir ni leil zzorci-ddami zzor a ggegge-sese nixixl dixl mal gger. <sup>19</sup> Yel zzi maelleil, kax mel gga goxr dae Yoxrdaxl su ca maelmaerjjia lei, Yaxldaxr xiu gga ceili cir ni zzorci-ddami zzor a ggegge-sese nixixl goxr a, zzicarzzi leil zzaegu ho.

### Pur'aer Jiax Ddei Arsae Lei

<sup>20</sup> Moxldirgier xil vaexr a eilmel vaexr zei lei a, Yahasuirlur zzirmar ddei goxrrjia gga vimir ggie nei naer ggie cirmaex-hanga gga hher dae Yoxrdaxl su ca mel leil ho mal gger. <sup>21</sup> Yar yaa leil miardal a, cirkoxl-hanga lei Yaldaxrxiu gga ceili, ceingor eil nr ni jiax goxr lol. <sup>22</sup> Eil xiubbo gga nixixl hal nr ni, Yoxrdaxl su ca mel yaa leil dir su ca mel leixrga gga ddux lei a zzasoso a nga; cix ddu mel ggeseddu loxr, nge ddu mel vae ddu loxr nixixl dixl mal gger. Nixixl hal nr ni gga, zzorci-ddami zzor a ggegge-sese goxr, zzicarzzi leil zzaegu ho, casolssor mel leil sser zoxr mel gger. <sup>23</sup> Yoxrdaxl su ca mel Moxldirgier vaexr dae mel dax bei mae, yel, jiax eil ddei goxr a mel cirkoxl-hanga ddei leiddur nga a. <sup>24</sup> Yoxrdaxl su ca maelmaerjjia leil dir su, Yaljiaxr su ca Hamirdaxlta ddei ssor Hamaxl mel, halleix nr seir xiar a Yoxrdaxl su ca mel leil bei zil gger niazzir. Yar nijiu (yoxl Pur'aer nijiu lei bbeix) a nixixl ar ni tiur a, Yoxrdaxl su ca mel leil seixl zil jjia gger a mier lol niazzir. <sup>25</sup> Nael zzirmar ddei Halmaxl nr seir bei niazzir dae eil ddei leil saexl ho a, dder xil vaexr a miardal teixl a, Hamaxl Yoxrdaxl su ca mel leil ke niazzir dae mel, Halmaxl ddei oldde leil ddeix lol a, Halmaxl leil nei Hamaxl ddei ssor mel leil six jiaxjiax mel leil gaxl gex du lei a, bei zil gger a. <sup>26</sup> Yel Yoxrdaxl su ca mel Pur'aer mi eil ddei dax zox dae a, nixixl eil nr ni leil Pur'aer jiax eine bbeix. Yaa xil eil fo leil vaexr deix dae ddar hazza dax zox dae, yoxl yaa mia hazza dax nei yaa pex dae mel dax zox dae a dder, <sup>27</sup> armael leil, yaa giedae ca mel leil, halae yaa ddei ca loxr ho hal mel leil leiddur eil ddei dixl gger a, Moxldirgier miardal dae mel dax zox dae a, cirkoxl-hanga lei nixixl eil nr ni jiax goxr. <sup>28</sup> Cirmaex-hanga ddei mermi, cirmaex-hanga ddei zzi,

cirzeix-hanga, circuxr-hanga lei nixixl eil nr ni jiax goxr a, Pur'aer jiax ddei Yoxrdaxl su ca mel gga bei pixl nr gger lol, yaa giedae ca mel gga lei bei pixl nr gger lol.

<sup>29</sup> Yalbirhiexr ddei ssormaer, hherdder zzirmar maerssor Yirsitie nei Yoxrdaxl su ca Moxldirgier yaa quexrlixl maelmaerjjia sser a, xil nr fo ddei vaexr a, Yoxrdaxl su ca mel leil Pur'aer jiax eil ddei goxr nia zeixlleixr ar boxl miardal. <sup>30</sup> Toltor a nga lol ddar mel sser nei ddarzi mel sser a, Yalhasuirlur zzirmar ddei goxrjia gga cirxiu nrzeisir (127) maex middei gga Yoxrdaxl su ca maelmaerjjia leil xil vaexr gger. <sup>31</sup> Yaa leil Yoxrdaxl su ca Moxldirgier nei zzirmar maerssor Yirsitie miardal dae mel dax zox dae a, nixixl ddei ci a jiax eil ddei goxr nia miardal, halae Yoxrdaxl su ca mel, armael leil weix nei giedae ca mel leil weix a, dixl har dae mel dax zox dae a almeixr nr zzor aenge nia. <sup>32</sup> Yirsitie miardal dae Pu'aer jiax goxr nia eil ddei lei sul leil vaexr zeilei a.

### Yalhasuirlur Nei Moxldirgier Bei Dae Mel

**10** <sup>1</sup> Yalhasuirlur zzirmar mel hieltebbor goxr su nei neixvi qir leil goxr su ca mel leil miardal a, yar leil zzaegu ho lol. <sup>2</sup> Yar quexrlixl sser nei bbesur sser a bei dae maelmaerjjia, halae yar Moxldirgier leil vaervaerpor bei vaer lol hal mel, holbbaexl maelmaerjjia lei Mardaexl goxrjia nei Bosi goxrjia mel ddei zzirmar ddei sul mel leil vaexr nr deix dae a ngo? <sup>3</sup> Yoxrdaxl su ca Moxldirgier mel Yalhasuirlur zzirmar woxrke vaer zzir ddei bei dae a; Yoxrdaxl su ca mel gga mel vaer zzir ddei nga a. Yar mel Yoxrdaxl su ca mel leil seirggiebbær qiuxr gger, yaa dax ddar toltor a hal mel te. Yel Yoxrdaxl su ca mel yar leil i du, yar leil ggese.